

Uunga allannguutissatut siunnersuut

Uunga siunnersuut: Ilageeqarneq pillugu Inatsisartut inatsisaata allanngortinneqarnera pillugu Inatsisartut inatsisaat

Aappassaaneerreqarnerani Naalakkersuisunit saqqummiunneqartoq

§ 1-imut

1. Inatsisissatut siunnersuummi § 1-imi nr. 1-itut nutaatut ikkunneqassaaq:

”1. § 3-p kingornatigut ikkunneqassaaq:

” § 3 a. Palasit, provstit, domprovsti biskoppilu Naalakkersuisut atorfinitsillugillu soraarsittarpaat.

Imm. 2. Palasinik, provstinik domprovstimillu atorfinitsitsinernik soraarsitsinernillu biskoppi isumaginnittussanngortillugu Naalakkersuisut piginnaatissinnaavaat.””

2. Inatsisissatut siunnersuummi § 1-imi nr. 2-tut nutaatut ikkunneqassaaq:

”2. § 7, imm. 3 atorunnaarpoq.”

3. Inatsisissatut siunnersuummi § 1, nr. 4 aamma 6-13 atorunnaarput.

Siunnersuummut nassuiaatit

Nassuiaatit nalinginnaasut

Kultureqarnermut, Ilageeqarnermut, Ilisimatusarnermut, Ilageeqarnermullu Ataatsimiititaliami amerlanerussuteqartut aappassaaneerreqarneranut isumaliutissiissutaanni inassuteqarnerat naapertorlugu siunnersuut saqqummiunneqarpoq.

Palasinik, provstinik domprovstimillu atorfinitsitsinissamut soraarsitsinissamullu piginnaatitsinerup inatsisitigut Naalakkersuisuniiginnarnissaa ataatsimiititaliap isumaliutissiissutimini pingaartillugu oqaatigaa, Naalakkersuisulli biskoppimik tamatuminnga suliassiissuteqarsinnaanerit periarfissaassaaq.

Ataatsimiititaliap inassuteqarnera siunnersuummi akuerineqarpoq. Atorfinitsitsinissamut soraarsitsinissamullu suliassiissuteqarsinnaaneq pillugu inatsisitigut tunngavissamik erseqqissumik ikkussinikkut tamanna pivoq. Taassuma kingunerisaanik allannguutissat siunnersuutigineqarput, tamakkulu aalajangersakkat arlaqartut atorunnaarsinneqarnerannik kinguneqarlutik.

Allannguutissatut siunnersuummi aalajangersakkanut ataasiakkaanut nassuiaatit

Nr. 1-imut

Imm. 1-imi erseqqissumik aalajangersarneqarluni siunnersuutigineqarpoq palasinik, provstinik, domprovstimik biskoppimillu kina atorfinitsitsillunilu soraarsitsisassanersoq. Palasinik, provstinik domprovstimillu atorfinitsitsinissamik soraarsitsinissamillu imm. 2-mi suliassiissuteqarsinnaanermut inatsisitigut tunngavissiornissamut taanna piumasaqaataavoq.

Nr. 2-mut

Biskoppimik atorfinitsitsinermut soraarsitsinermullu aalajangersagaq palasinik, provstinik domprovstimillu atorfinitsitsinermut aalajangersakkamut siunnersuutip § 3 a-mi ilanngunneqarmat aalajangersakkap atorunnaarsinneqarnissaa siunnersuutigineqarpoq.

Nr. 3-mut

Atorfinitsitsinissamut soraarsitsinissamullu piginnaatitsinerup Naalakkersuisunit biskoppimut suliassiissuteqarsinnaanerata siunnersuummi aalajangersakkami atorunnaarsinneqassasoq aalajangersarneqarpoq. Nr. 1-imi aalajangersakkap siunnersuutigineqartup tamanna kinguneraa.